

四庫全書

集部

欽定四庫全書

弇州續稿卷一百六十二

明 王世貞 撰

文部

墨蹟跋

趙松雪書千文

右趙承旨千字文不言是何年書當是至元以後延祐以前無疑也蓋其功力既完精神正王故於腕指間從

容變化各極其致中有疎而密者柔而勁者生而熟者  
緩而緊者出山陰入大令傍及虞褚不露蹊逕正以博  
綜勝耳文待詔乃謂師李北海吾未敢薦也三十年所  
見千文真蹟多矣紹興董氏智永真草從規矩出風度  
當為第一本三辰顧氏懷素草從風度覓規矩當為第  
二本此卷折衷二僧間具體而微不免屈居第三若趙  
模時代雖古而韻不足鮮于樞骨力雖強而氣不清四  
五之間尚為幸矣敬美試覈之不謂楚旨師強辨璞否

又

今年六月有故人以趙文敏公千文來售者初閱之則  
潦草酬應厭勸筆墨之意可掬為再三過時時得佳字  
重翫之則構結波策有不容言之妙覺右軍父子出入  
腕指間文休承謂生平見公草書僅二本此本尤佳絕  
蓋公以至治二年壬戌四月廿八日書以六月辛巳捐  
館中間閏五月十八日曾跋子敬十三行洛神賦謂老  
疾不能作跋雨後稍涼書此蓋去書千文僅二十日耳

是宜其有厭勸色而老手斲輪運斤成風之勢故不容掩然公自是翰墨緣且盡矣余置書畫緣亦於今日盡臨紙黯然低回久之望日曬書題

趙松雪書歸去來辭

趙吳興書歸去來辭極多獨此為第一本妙在藏鋒不  
但取態往往筆盡意不盡與余所寶枯樹賦結法相甲  
乙余生平見蘇長公鮮于伯機及公書此辭不少然見  
輒愧之自己卯冬決策不出明年棄家作道民稍堪一

舒卷然陶公好酒乏酒貲余好酒酒貲頗不乏而年來  
厭謝杯勺以此竟輸公一籌人間世貴人嗜書畫若渴  
獨此辭以見諱得免近始屬吾弟敬美敬美倦游且歸  
矣歸則遠出吾上再能作趙公書步陶公辭第畏酒一  
籌亦恐不免輸却因戲題於後

又

彭澤天隱人作此天隱文字一絕也以吳興書畫之二  
絕也以吳興畫畫彭澤像三絕也吳興稱右軍蘭亭能

乘退筆之勢而用之此書正是退筆疎密師意不墮貞  
伯奴書謂四絕也吳興此畫尤出塵跌宕道元伯時間  
獨得彭澤風氣五絕也跋者柯敬仲黃子久諸名儒深  
於二家理六絕也幸不入長安朱門為吳興里人姚生  
所得不減彞齋之寶定武七絕也觀者吾弟敬美近棄  
秦中紱彷彿柴桑栗里之致而吾與元馭學士以兩道  
人從旁史之八絕也去重九不四日天高氣澄大是展  
卷候九絕也恬淡觀中焚香閱之髯枝四垂籬英欲舒

居然松菊三徑十絕也題此後吳興固為我絕倒彭澤  
當亦不免作虎溪笑如何

趙松雪書歸田賦

趙吳興子昂書張平子歸田賦有以為類宋人者當是  
見其取態謂米襄陽見其藏鋒謂薛河東耳不知結法  
自二王來而大令分數獨勝其視二子居然有閉門造  
車開門合轍之妙與余家所藏天馬圖贊雜詩蹟正同  
大較高處在肉不沒骨筋不外透雖姿韻溢發而波瀾



老成譬之豐肌玉環作霓裳舞誰不心醉平子此賦殆  
是解太史令五年內作聊以寓其蕭散跌宕意耳春秋  
至六十三尚作尚書典樞要豈若淵明之真能咏歸去  
來者史固稱其少工屬文貫六藝善機巧以後身之蔡  
中郎始究八法而兼綜之千載而得吳興其才技風流  
大有相賞契者而豐生老諄不學僅取歸田之名而恣  
其甚口於宋王孫寧非所謂蜉蝣撼大樹耶且吳興卒  
於至治二年年六十九而今謂延祐以後七十餘時筆

結法妙脫蹊逕非祝希哲十九首畧近之而嗤其頽筆  
老態遇殺風景人無可奈何因附志於此

趙松雪行書唐詩

余嘗評吳興作北海書往往刻意求肖似勝而不及獨  
此數詩筆以自然發之風骨秀逸天機爛熳佻而能緊  
真有出藍之嫩六觀堂藏趙書無不佳者陰符經枯樹  
賦及此而三今皆為九友齋中物矣書此以志沾沾

趙松雪墨蹟

趙吳興擬古五首失利適逸出入李北海所謂本色書也趙有本色書猶沈啓南有本色畫第非最上乘耳然結法無一筆失度要之極真無可疑者末一札稍自放逸以不經意故佳耳書辭却可笑稱無等僧錄吾兒無等者僧字也然前後自署名唯謹至吾兒二字輒提上蓋公篤於佞佛其夫人管氏致書中峰和尚稱女弟子而公所度墳庵僧即拜公為義父以故書辭中皆僧俗兩家事使世眼人見之鮮不以為贗者第果贗筆却不

作此理外稱謂也

趙松雪洛神賦

趙吳興洛神賦乃中年筆不甚經意而時時有法外賞  
十行後姿態溢出宛然驚鴻游龍也歎賞之餘為題其  
後

趙松雪手書十五詩後

趙吳興自謂此十五首不讓唐人中間致語如北來風  
俗猶存古南渡衣冠不及前白鷗自信無機事玄鳥猶

知有歲華平生能着幾緡屐負郭何須二頃田白露已  
零秋草綠斜陽雖好暮雲稠南渡君臣輕社稷中原父  
老望旌旗故國金人泣辭漢當年玉馬去朝周其用意  
使事間出唐人表所以不及唐人亦坐此若書法則密  
不掩態媚不勝骨上可以入大令室下亦踞北海客右  
矣據題延祐五年書付從子玠是公為翰林學士承旨  
最承恩日也蓋六十有四歲矣以故書法入化境如此  
跋尾子俊者玠父也公集中有倡和詩其書如王謝家

子弟雖散髮躡屐亦自有貴門風

趙松雪書秋聲賦

趙承旨此書英標勁骨謾謾有松風意要當與秋聲鬪  
雄而行間茂密丰容縝婉春氣融融波拂間故賦所不  
能兼有也承旨書與歐陽少師文皆中古而後最鮮令  
標舉者惜不能脫本來面目盡脫之何必減羊中散褚

愛州

趙吳興管夫人仲穆三札

趙承旨與婦魏國管夫人子仲穆總管各有寄中峰禪師書一通吾弟敬美得而寶之又為志之計中峰所得趙公家竿尺故不止此公行狀稱元延祐帝及太后愛公翰墨有應制則命管夫人與仲穆副其體而藏之秘閣曰令後世知子昂父子夫婦皆工八法也人王法王後先欲得公筆作藏寶第公一辦心香則寓幻住庵久矣逃虛老人何用復嘵嘵為空門飾蛇足然老人書亦自適婉堪與幻住守衣鉢惜署尾失計稱青宮少師

鮮于伯機游高亭巖詩記

鮮于困學氏博學負材氣貌偉而髯類河朔傖父余見其行草往往以骨力勝而乏姿態畧如其人以故聲稱漸不敵趙吳興人謂吳興以已書三紙易困學一紙焚之恐未必爾也此游高亭巖記及詩凡一千六百五十六字見鐵網珊瑚中字兼正行體大小如宣示而備有褚柳筆法其文亦典贍可喜獨所紀淨師草聖以為錢唐人家所收王逸老合作皆其筆却大誤逸老名升別



號羔羊居士宣和中嘗獻草書稱旨得官至紹興時年八十餘乃終楊用修著墨池璫錄謂逸老南唐人名文棟又誤也逸老不合狂擬右軍兩見誣作僧俗人可發一笑

鮮于伯機雜詩

開卷數行疑以為文徵仲正德間書以後結法稍不類然不敢斷為鮮于伯機筆也伯機行草頗縱而有骨然不能盡除河朔氣此書極有風度結字似疎而實密波

拂之際姿媚橫生比之他筆猶更楚楚跋尾因學翁為  
去矜書去矜字必仁伯機子也蓋用右軍與子敬例伯  
機卒時年四十六其稱困學翁亦以去矜故云

趙吳興詩蹟

趙吳興詩落句云梅花心似鐵此老恐未渠能爾然閱  
其句法之遒健與結筆之勁挺恐不如也陳生強我題  
真佛頭拋糞赧然久之

吳興擘窠行草遒逸飛動似米顛而骨勝之然不可更

過過則班彥功矣落句云白鳥忽飛來青天一片雲殊稱是

元名人墨蹟

右元名人墨蹟余後先所遴凡二十五紙擬以配宋賢者其人稍不敵其書法不啻如之聊為敘次如左趙孟頫字子昂吳興人以薦累官翰林學士承旨贈江浙行省平章魏國公謚文敏公於八法無所不精詣而尺牘尤舉舉得二王三昧此書雖造次亦自有風度不可及

也書辭謂年已耳順又云有召命使臣在門當是皇慶  
癸丑以集賢講學上冢歸召為翰林講學耳雪菴者僧  
也溥光其名元暉其字李其俗姓累拜昭文館大學士  
賜號玄悟大師善擘窠正書元時宮殿榜署皆其筆此  
紙乃與門離者故草草耳然亦自有誠懸骨內所云太  
后臨寫五臺碑文名額此亦一證鮮于西溪者名樞字  
伯機西溪其號也又號困學氏漁陽人以太常典簿終  
此一詞藁耳而陳樞者藏之二十年而又記之書法適

美不可言正與余藏高亭巖記詩同一結構鄧文原字  
善之錦州人徙家錢唐累官翰林侍講學士出為湖南  
廉訪使贈浙江行省參政諡文肅公書名雁行吳興而  
不及也此一札乃報人志墓者獨適逸可愛胡長孺字  
汲仲婺人博學而貧耿介自命趙文敏極重之仕不顯  
以長山鹽司丞卒戴表元字帥初慶元人以文行稱為  
信州教授歸兩用翰林修撰集賢博士召不起二君不  
忝文學隱逸者流所題皆范文正伯夷頌詩語平平正

得伯平而已庫庫字子山喀爾氏累官學士承旨提調  
宣文閣崇文館後以江浙平章召天子且倚以相而遽  
卒然僅賜銀五鎰以葬而贈諡皆不及不可曉也史稱  
其得晉人筆意單牘片紙人爭寶之書家者流至引以  
抗衡吳興而此跋殊草草不稱虞集字伯生蜀人以薦  
累官奎章閣侍書學士贈江西行省參政仁壽郡公諡  
文靖此詩乃貽白雲間公者自稱無住菴主計其時目  
且青矣而老筆紛披可念揭傒斯字曼碩富州人累官

奎章閣供奉學士以侍講學士總三史卒年七十二贈  
豫章郡公謚文安史稱其文嚴整簡當詩尤清麗善正  
行書今此送遠上人序於書法文體見一斑而浮屠語  
則未也顧安字定之仕為泉州路總管府判官善墨竹  
有與可風此札與天啓僧者行筆亦圓熟吾衍字子行  
太末人游寓錢塘好古博學負氣尤精篆籀理自謂出  
李陽冰徐騎省上偶以微絰自恨沈死宋承旨濂嘗傳  
之此五詩僅去俗以書法擁燼不稱令人興索喬簣成

字仲山攷元史皆不載僅見之右軍千嘔帖朱巨川告  
跋書法不能佳而攷據頗精洽據此詩尾謂早歲苦吏  
事叢脞不為詩當亦是一州邑官也張伯淳字師道杭  
之崇德人舉童子科再舉進士累遷翰林侍講學士其  
書所謂序乃送一校官者結法美而圓亦名筆也杜本  
字伯原清江人博學工文能繕性人主微之不起數賜  
金幣上尊最後以翰林待制召竟不起學者皆稱清碧  
先生余嘗見其一碑書極清麗似吳興第少弱耳致此



札乃不甚離俗李簡字士廉廬陵人移居吾崑山不仕  
能工詩尤精於堪輿家言此詩雖不佳而小涉禪理後  
有和韻名植者不知何許人也張天雨即伯雨也師吳  
閑閑度為道士自號貞居又號句曲外史善詩及書畫  
尤遒勁有風骨重虞揭諸公間此札多言雅事楚楚可  
念汪澤民字叔志婺源人累官禮部尚書致仕賊破宣  
州不屈死之贈浙江行省左丞譙郡公謚文節台哈哈  
字兼善巴約特氏舉其榜第一人以翰林侍讀學士出

為江東道宣慰使都元帥台州路達魯噶齊死慶元方  
氏難贈浙江行省平章魏國公諡忠節以工篆隸名二  
公所題亦伯夷頌讀其辭其能仗節死義不偶也鄭元  
祐字明德浙之遂昌人仕至浙江儒學提舉此君以右  
手脫骭任左第書法潤而有度無左一筆伯溫者周伯  
琦字饒人也以崇文太監出為陝西行臺廉訪使晉江  
南行省左丞治吳見縻張士誠不能死高皇帝薄其罪  
得老牖下幸也伯溫精篆籀隸古其所書九日詩似是

流寓筆楊維禎字廉夫會稽人號鐵史又號鐵遂道人  
博學豪詩歌自謂不減晉氏風流仕元為浙江儒學提  
舉高帝召修勝朝史不受官歸以老死此贈寫真陳伯  
玉歌歌與詩豪縱之氣可掬二君聲實不相下晚而薰  
蕕故不必蓋棺也鄉瓚即倪瓚字元鎮無錫人別號雲  
林居士又自稱懶瓚至國朝始卒君以畫名世而書亦  
得大令法此詩頗能去俗饒介字介之番陽人號華蓋  
山樵自翰林應奉僉江浙廉訪張氏承制以為淮南行

省參政頗用事諸文士趣之入明以不良死此札清麗  
流放覽之洒然王蒙字叔明號黃鶴山樵趙吳興甥所  
謂承平公子有故態文敏外孫多異書者是也洪武初  
起家泰安州守坐法死叔明以畫重勝朝號四大家而  
書亦邁駿此尺牘家人語故佳其外又有陸緒者不得  
其人以詞翰故留之元自趙文敏倡臨池一時士大夫  
慕習其學是二十五人即不以書名者書靡不合作即  
強半以詩文名詩文多不成語真足愾歎嗟夫安得令

文敏伯機子山輩不必書已作而盡寫馬致遠王實夫  
鄭德輝關漢卿搗語雖雅鄭不倫亦足表氈裘之盛為  
一時快哉

虞伯生賜碑贊

道園先生正書八分俱入能品此卷為柯九思博士作  
賜碑贊用筆若草草而中自遒勁有古挑截法其文辭  
尤雅淨可誦雖然令舜華一經意亦自到也

王舜華求  
跋似是其

筆故  
云

虞道園詩

道園先生書法可甲乙庫庫趙此書筆雖適而結法小疎  
詩語亦不任經意獨結尾使事押韻皆狙駿可喜耳

虞貫二學士詩蹟

右奎章閣侍書學士虞集伯生翰林侍講學士貫雲石  
海涯墨蹟合一卷雲石西域人其文不能如伯生而材  
器磊落志行卓詭亦一代奇品也伯生詩起語領聯殊  
不類生平唯一結稍疎俊耳書亦稱是雲石四時宮詞

差溫麗可咏縱書渴筆蒼然而皆不免幽燕氣所謂康崑崙琵琶手也須段師印證之乃得一淨洗

柯敬仲十九首

柯丹丘敬仲於四體八法俱能起雅去俗此以古隸書古選宜其合作也十九首中多歎榮華之不久人命之難期敬仲始受知人主司書畫考功晚途骯髒流落江左蓋於篇中有深慨焉是以波拂雖古雅而不無圍圉意昔人謂右軍書告誓則情怫鬱柯生殆近之矣

張伯雨書諸公贈言

昔懷素師有自敘帖與夢英石刻皆諸名士大夫詩今  
句曲外史復手錄松雪道園海粟諸公尺牘豈方袍鶴  
氍人例不能忘一切有為跡耶第此稿紙不經意而結  
法極適倭得晉諸賢意留之後人作山家清翫乃佳耳

趙吳興真草千丈後

永禪師書真草千丈後先散施江左僧寺蓋千餘年而  
余於會稽董文玉侍郎家覩八百本中之一本自恨此



生如值阿閼國一見不再見今年在敬美弟處獲觀趙  
吳興此紙所謂煥如神明頓還舊觀者非耶其結法道  
緊圓潤工力悉敵而波磔之際往往鋒鏃中發異趣酸  
餽之氣為之一洗跋尾皆國初名士如宋承旨父子王  
待制胡山長蘇太史吳殿學名腕中有眼者然不肯作  
僕此狂語僕老矣後必有以為知言者

俞和張伯雨真蹟

紫芝生俞和書法秀潤圓熟真得吳興三昧不敢謂之

出藍要亦在堂室之間若句曲外史張伯雨不拘拘八  
法而適挺有生氣要不可以方內目之此卷紫芝所臨  
樂毅論當令楚王大驚其抵掌故不至婢作夫人也句  
曲游天平山記及八絕句皆吳中勝事尤可披賞此書  
本作深山道士觀或進以散僧入聖純甫謂為何如

楊鐵崖真蹟

楊廉夫作湘竹龍吟辭贈老伶杜清清蓋出所藏鷓鴣  
文簫壽楊而侑以其伎又命小娃歌楊所作鐵龍引倚

而和之故賦此為贈題云老鐵醉筆末又有馮以默七  
言律邵思文長歌不知名竹西者絕句其結法小異而  
墨色正同疑皆即席之和也余謂老鍊心腸如鍊腕如  
鐵正為小娃一歌軟却耳彼老伶手三尺竹何能動之  
然味其調要須銅將軍鍊拍板乃稱耳又豈區區小娃  
所能按也

明唐宋二子墨蹟

唐應奉文筆在金華二太史雁行而不以書名今所書

山陰樵者敘極端勁有顏平原朱巨川告體宋南宮今  
隸及章草三紙皆古論書三昧語其結法從力命表出  
師頌來入眼若疎野而實秀密筋骨橫溢要不可以蹊  
逕求之嘉則跌宕墨池四十年不離豫章一步今得此  
當軼塵而奔矣其善有之勿謂齊中少年所掩也

宋克書張良史筆意

宋仲溫作今隸多間以章草然未有如此卷者結法極  
精緊而波法又甚秀逸令人有溢目趣吳文定王文恪

二公跋尤更朗朗特以余家藏張長史筆意善本校之  
中間大有漏誤如使知是道落一是字豈得任感戴衍  
一得字從行誤作促行其謂誤作謂其書之未能誤作  
求能末以成畫誤作成書及後巧謂布置稱謂大小二  
條總論一篇皆不錄蓋勝國時此書行世甚少仲溫似  
未見全本故漏誤因之以吳王二公之博雅而不能辨  
何也友人俞仲蔚於書法尤妙因托令補之而為拈出  
所以不然後有董道黃伯思紛紛置喙矣

吳中諸帖

右吳文定公寬一紙歌行古選各一紙倣眉山太敬斜  
當令長公見之攢眉耳祝京兆允明文待詔徵明各二  
紙王徵士寵一紙皆尺牘京兆最草草而最有致陳太  
學道復二紙其後一紙楷書行題名不辨為道復也乃  
知此君晚退耳今輟以贈張長輿而題其後長輿日臨  
池不知小可得力否

損本三君法書

前一紙為天全先生送景寅參政聯句三十韻行體適  
美雜有褚米法跋尾始自放天真爛然而至後一紙水  
龍吟慢則筋骨姿態種種橫逸或鋒利若錯刀或虬健  
如鐵絲最合作書也又范菴先生錢塘三律縱筆自喜  
神采奕奕射人此翁極誚人奴書而亦不免有豫章吳  
興意然至曩時所謂院體一掃盡之又西涯先生楊子  
洞庭二律為陸水村公書未及畢而以酒至解是時陸  
尚為御史未幾先生大拜陸遂不敢請而跋其事跋今

在名賢遺墨中余後先四得之合為一卷以便批覽蓋  
天全西涯二公名位相敵而范菴以風節翱翔其間不  
肯下一當合也天全書固自有飛動勢二公尚法而此  
特縱遂皆為生平極意筆二當合也為詩三為詞一而  
首皆缺有二字者有二韻者有小半闕者三當合也夜  
光之璧不以損而減朗沈予所得皆照乘者哉因題之  
曰損本三君法書

李西涯詩



李西涯先生最得意此岳陽樓二律故輒為人書之而書筆亦遒逸橫放可喜雖然誰能為識悔此二障也

諸賢雜墨

此卷乃李范庵先生家藏物內有李文正公吳文定公各二紙張東海沈石田各一紙皆尺牘之與先生者祝枝山一紙尺牘文衡山二紙一詩一尺牘都南濠二紙俱詩則與先生之子元復者又先生與子家書一紙按文定後二紙皆及亡友周原已身後事詳懇隱惻至不

忍讀范庵先生與子所謂諸事便當如我死一貧正不  
要人知讀之令人悚然前輩風格往往如此吾每得吳  
中諸名蹟好以歸其後人嘗歸汗漫游卷於許太僕初  
歸祝京兆貽款鶴書於王吏部穀祥歸李文正都事節  
義序於其外孫陸秀才圉獨李氏後無可歸者記而俟  
之

三吳諸名士筆札

諸名士筆札吳文定原博祝京兆希哲王太學履吉陳

太學道復各得二紙沈山人啓南李太僕貞伯顧尚書  
華玉金先輩元玉陸詹事子淵王中丞履約王吏部祿  
之彭山人孔嘉各一紙又有名承舉者號癡翁者皆白  
下人攷其筆意似亦隱君子也吳公後不完札與希哲  
後談瑣事一札道復小詩筆意俱更適美華玉結構清  
密子淵尤雅俊而不能無意元玉履吉翩翩自快履約  
行邊時書寄履吉者所及時事縷縷其謂江陝二省程  
文冠諸省蓋一時郎署名手也祿之與履約札謂舉筆

目眩聞之則成雙筆且屬不可聞衡翁語劇可笑蓋是時衡翁踰八袞尚能作蠅頭楷故也祿之自是草草吳興如一束枯枿而已孔嘉虎丘詩既不俗而書筆流利不作眉山體驟看之未有不以為文氏者

題陸氏藏交游翰墨

吾州先達陸式齋公以文學節概名一時尤有經世才而其官浙藩時中萋菲不獲展公為尚書兵部郎最久所與交無非當世知名士若卷中吳文定李文正李文

安三公陳克勤陸鼎儀李貞伯張亨父張汝弼文宗儒  
六先生皆其人也陸公有子曰安甫博學而文安甫二  
子曰肖孫象孫肖孫子曰昌孺象孫子曰吉孺吉孺死  
象孫遂絕然皆世世受經術以修辭顯而昌孺復能手  
葺諸賢之蹟成卷以示余且謂此所存者千百之一二  
耳吾饘粥之業廢而姑以此併吾身與吾廬而僅為三  
也雖然若鼎儀若亨父亦皆吾州人鼎儀之後衣裾尚  
有存者第不能守其先人之典籍而亨父則為若敖之

餒久矣昌孺其猶賢乎哉余故為詳識之以勉其後人  
之世守者若以乞它人不直一飽飯也

李貞伯書古選祝希哲音釋後

咏諸詩恍若與曹劉潘陸三謝周旋及再覽貞伯太僕  
希哲京兆大小楷筆又似彥輔叔寶冰清玉潤相倚暎  
也雖病眼眊昏不能不為之作青

又

目疾小愈復從廷韓處借閱一過覺英立頓朗太僕生

平楷筆余見之亦不少往往不無佐史歎獨此書精密  
秀勁與余所藏鍾成侯薦季直表跋皆妙品也第此老  
畫法礫法皆自虞永興來而大罵人奴書所不可曉孔  
嘉不待題印能懸定之許具一隻眼若希哲草草批乙  
亦堪散僧入聖不難辨也余方選集三吳楷法幾欲奪  
之以義不可而止因識於後

李貞伯游滁陽山水記

李貞伯先生記游滁陽諸山水數千言其文詞宛悉穠

至有周益公范大資陸秘監風攷其時為成化癸巳以  
中翰謁告歸與宜興靜怡翁者偕至滁訪翁之子太僕  
丞瑞卿相與游而作者也靜怡不知其姓名當是有齒  
爵者李先生記成之十五年餘而為南太僕貳卿署於  
滁按記而游游而作歲月當無復遺憾矣先生以書開  
吳中墨池其腕法甚勁結體甚密而不取師古往往謂  
趙吳興以為奴書故其玉潤亦不盡滿之余所見數十  
本大抵小楷不能十一又不無佐史之歎獨此記於勁



密中發古雅俗骨換盡天然嫵媚當為目中第一兒曹其善藏之

姜立綱書

故姜太僕立綱書此四子全文句讀各有圈甚精當是先朝春宮進讀本也結法圓熟端勁妙不可言初見絕以為沈度學士書徐覺其波磔處小露鋒鋌乃敢定為姜筆噫嘻今兩制諸君不復能辦此矣

先大父交游尺牘

尺牘一卷皆弘正間名臣所與王父司馬公者為大宗  
伯章文懿公懋少保彭襄毅公澤中丞毛公珵大司空  
孟公鳳御史大夫周公季鳳大司徒李公瓚少司馬任  
公漢大司成陳公霽御史中丞王公崇文大司寇周公  
倫光祿卿劉公乾太宰夏公邦謨凡十二人共十四章  
一稱臧尚未復姓故也章公前輩彭公為總帥雖令人  
代書而字殊細辭亦精謹其它有不盡爾者王公為先  
郎中公同年子年事亦遼邈而後一紙縱筆自快周公

鄉里科第相去二十三年夏公部人相去至二十三年而書法亦廓落講禮如敵蓋一為御史一為吏部郎當其時風習已不甚古矣後十一札則皆蜀中舊寮其人聲實不大顯而頗能詳其時藍鄙兵事故附存之此卷舊在伯父房仲氏處賤直償博進今年偶見之於鄉人陳生所以二金贖得裝潢付兒輩此卷在它人所如靈武告身不能博一醉若在吾家則雖敗角如意亦青箱中物留之勿復償博進也

武氏藏交游翰墨

吾太倉之未為州而城居者陸參政孟昭太常鼎彝參  
政文量以政術文學顯天下稱之為三陸先生而萬戶  
武侯號矢庵者後先與之友以詩相倡和侯之孫曰勲  
復為文量館甥勲之孫字周卿領衛事最賢而能死難  
周卿之孫憲卿謁余而出三陸先生所與矢庵酬和詩  
而龔大司空弘胡司徒璉王司寇鼎彞通判悅之作附  
焉蓋一時名政術文學人也則亦相酬和者也夫吾州

之為衛者二諸萬戶不下數十人然多以紂袴敗其世  
風屈指不易數蓋至問其故居且不可得而況於其前  
人所還往與酬和之遺蹟乎哉今獨武氏之故第歸然  
其木日以喬而甘泉之井尚無恙又能守其先世所酬  
和名卿大夫之詩而帙之其為善守而勿替何如也後  
人事事不能如前人獨於詩母和韻母聯句以此不落  
笑海中

弇州續稿卷一百六十二

欽定四庫全書

集部

弇州續稿卷一百六十三

詳校官編修

臣潘庭筠

侍讀臣孫球覆勘

總校官進士

臣楊懋珩

校對官主事

臣陳文樞

謄錄監生

臣朱麟粹

欽定四庫全書

弇州續稿卷一百六十三

明 王世貞 撰

文部

墨蹟跋

國朝名賢遺墨五卷

右有明名賢遺墨第一卷二十人故翰林學士承旨太子贊善大夫金華宋文憲公濂以文學佐內秉為一世

宗匠而所與徐大章書修謹甚筆法尤遒密可愛楊鐵  
遂先生維楨七言律一章句句使事雖勁麗而不穩妥  
書筆却遒逸足稱散僧入聖先生會稽人元儒學提舉  
也不肯食明祿以其嘗預史局且卒於洪武八年故收  
之胡仲申先生翰亦金華人以郡教授終其名在宋文  
憲王忠文間此書亦貽徐大章者頗極推許之致張羽  
潯陽人以太常寺丞不良死所作雪樵傳事與文皆清  
逸而隸法則韓擇木派也王達無錫人革除靖難間兩



為翰林院學士折簡一僧謂徐殿下尚未授職得非謂  
中山王少子膺緒乎亦以見當時稱謂如此解公縉一  
名縉紳吉水人初建內閣為首臣以左春坊大學士兼  
翰林院學士出叅議交趾下獄死此六絕句懷南安舊  
游作也時時見才情筆勢尤適俊然墨氣勝而結構小  
疎從子禎期臨右軍一札家雞宛然而換鶯意遠矣禎  
期初以學士累戍遼左後赦之為中書舍人七十餘尚  
供奉史局胡文穆公廣題漁父辭劍圖記以舟子辭金

事擬之蓋謂子胥宋瑞略相當而舟子漁父其節俠同而史佚之以為恨然文穆拈筆時恐不能無色恣也公廬陵人建文中狀元及第累官文淵閣大學士翰林院學士贈禮部尚書再贈少師楊文貞公士奇贈東莞丞一律一絕句勁筆紛披與語俱老公初名寓以字行亦廬陵人累官少師兵部尚書華蓋殿大學士贈太師名位器業一時名臣也胡頤庵先生儼南昌人以國子祭酒兼翰林侍講進太子賓客致仕楊文敏公榮建安人

以少師工部尚書謹身殿大學士卒贈太師金文靖公  
幼孜初名善以字行臨川人也為太子少保戶部尚書  
武英殿大學士贈少保三公同官內閣而同為胡文穆  
題漁父圖其一為古騷二為五言選調同書法小行楷  
亦同曾公榮梁公潛亦題此圖則皆歌行而語皆勝曾  
書法尤自精雅可愛亦吉水人也甲申狀元及第以少  
詹事兼侍讀學士卒贈禮部左侍郎梁西昌人以右贊  
善佐東宮坐間瘐死李忠文公時勉凡二紙其一跋江

母傳其一題陶靖節度履圖公安福人以國子祭酒致仕贈禮部左侍郎初謚文毅忠文其改謚也清忠勁節風表百世而結法乃婉媚而有致王文端公直泰和人文安公英臨安人同舉進士改翰林歷史局宮坊學士少詹事禮部左侍郎典內制無弗同者海內稱為二王先生而其自侍郎以後名位恩寵始迴絕文安瞠乎非埒矣今所送詩俱以初拜官遠地者其詩律筆意乃又無不同也陳文定公敬宗與李忠文同為祭酒天下以

南北師範稱之陳公為祭酒十八年不遷卒年八十有八其詩亦題昭關圖者小楷斐亶饒晉人意公之負臨池名固不虛也魏文靖公驥怡壽堂記為吾郡華氏書者精緊有腕力公蕭山人以南京吏部尚書致仕卒年九十八眉壽為我明文臣冠而行業亦稱是陳公璉挽李士文序詞翰俱清雅公東莞人為四川按察使吏部言其文而不善憲紀顧得改南京通政使領國子祭酒後以禮部左侍郎終甚奇事也卷凡二十人二十一紙

而江西獨得十之七云

第二卷錢文肅公習禮臨江人也四十餘入翰林以禮部右侍郎致仕卒年八十九此蹟一輓章耳以公品清貴故留之楊公翦吾郡人繇薦入翰林為邸府右長史邸王登極公老矣累進禮部尚書食祿不視事卒年八十五所書梅軒記為陳有成作有成故太保僖敏公鑑弟也其辭翰皆頽然長者高文義公穀揚之興化人以少保太子太傅工部尚書謹身殿大學士兼東閣大學

士致仕卒贈太保其敘余青陽集毅然有解金帶贈王  
舍人疏廬陵束鹿氣而書法却妍婉令人作留侯好女  
子觀于肅愍公謙錢塘人以少保兼太子太傅兵部尚  
書中讒死贈太傅公精忠大節載在國史此詩乃題黃  
子久江山萬里圖者以不切於圖故割置此馬公愉臨  
朐人狀元及第以禮部右侍郎兼翰林院侍講學士卒  
贈尚書張文僖公益上元人以翰林侍講學士死土木  
難贈學士二公皆登內閣不躋極品所題城南書屋詩

為戴文進筆藏余家今留置於此徐天全有貞吾郡人  
初名珵累官華蓋殿大學士封武功伯削爵謫金齒放  
歸卒送僧素菴住持宣府彌陀寺序乃少年書而中有  
塗乙筆殊秀勁彌陀寺上谷名刹也建於譚大將軍廣  
楊東里先生嘗記之林學士文題張氏手澤記辭翰皆  
質勝張之先適者吾郡人洪武中十才子也嘗仕工部  
郎謫廣州宣課大使死學士閩人進士及第踰四十年  
而尚滯五品其後僅加太常少卿致仕當時固如是也



商文毅公輅淳安人三舉第一人及第僅四載入內閣  
又五年而至少司馬學士歸田僅十年復召累進少保  
吏部尚書謹身殿大學士又十年而歸歸又十年而卒  
贈太傅韓襄毅公雍吾郡人二十九為僉都御史撫江  
西後累進右都御史總兩廣諸軍此二札皆與吾鄉練  
綱御史者韓公推賞獨至蓋以才氣合也彭文憲公時  
安福人狀元及第之明年即入內閣旋出再入以少保  
吏部尚書文淵閣大學士卒贈太師所書乃輓章而有高

誼舊為鄉里重直言曾感帝王尊語得非為李忠文作  
耶劉參政先生昌吳縣人弱冠登高第而官不甚達先  
生以博識名今題宋江山簿推恩告身而疑其制不能  
攷何也太子太保吏部尚書贈太師三原王端毅公恕  
報少保閔莊懿公珪一札以惠書為謝是時問遺可推  
已然筆頗謹細不類北人恐佐史為之以公名臣第一  
不敢不存也太子太保兵部尚書贈太保青神余肅敏  
公子俊一詩味其語似於嚴郡謁范文正祠作少師太

子太師吏部尚書華蓋殿大學士贈太師宜興徐文靖  
公溥一詩則卷冊中長語也公弘治中首輔頗以寬靖  
長者稱刑部尚書盱江何文肅公喬新與郁秋官札乞  
琬琰集春秋纂言懇懇且云別後日益衰邁間中惟以  
經籍自娛而已楷法極謹細無一筆苟正與志傳所載  
合太僕寺少卿長洲李公應禎初名甡生平負氣有大  
節放舟一律亦得小致語此公以書名而波拂間時露  
崛強殆類其為人已翰林院檢討白沙陳先生獻章大

儒也然以一膺薦貢士作省臬書而詞旨縱放又多潦  
倒筆半不成字且誤稱閔公為憲副而旁注一長字豈  
與閔契深不規規世法耶亦足以見爾時人之樸矣國  
子監祭酒冰玉羅公璟以趨朝賜麵小詞寄陸欽太常  
筆法頗欲學宋仲溫而未成長然當其時亦錚錚不知  
何故遠讓長沙禮部右侍郎領國子祭酒方石謝公鐸  
為人作一詩不知何題而頗清雅其名位品裁卷首尾  
正得平無軒輊也卷亦二十人幀如之而吾郡稍稍有

餘者

第三卷李文正公東陽二札書筆俱清麗而後札與倪公岳者然不稱同年或以館契重耳公長沙人隸燕中戎籍累官少師太子太師吏部尚書華蓋殿大學士贈太師倪文毅公岳一札乃寄同年閔莊懿珪者公時以宮保長留銓而閔公以宮保正中臺乃自稱友生又不及閔別號亦可見爾時之朴也公後入為吏部尚書卒贈少保太常少卿兼侍讀陸春雨先生鉞哭用常一排

律過亨父故宅一律翰林院修撰張滄洲先生泰哭子  
五絕句皆銷魂語也二公皆吾州人皆負文學而皆不  
獲中壽以死其後皆凋落而張尤甚用常不知何許人  
似是官乍顯而溺死亨父即張不知結韻劉後村相與  
何事太子太保兵部尚書贈太保華容劉忠宣公大夏  
二札一與郁公即前卷所謂秋官者一則其子華容令  
華容令余外大王父也都察院左都御史贈太子太保  
戴恭簡公珊一札寄閔莊懿者二公皆孝廟晝接賢臣

想見其時為之慨羨屠襄惠公瀟在吏部數行要閔公  
出郊過談且云有奇果一品未薦竟不知何物也公鄣  
人以太子太傅尚書罷歸召領都察院卒贈太保禮部  
侍郎兼侍講學士贈尚書新安程公敏政禮部尚書贈  
太子太保常熟李文安公傑各有詩投吾州陸文量而  
山莊二絕有味乎言矣文量名容吾州人有經濟才以  
浙江左參政中萋菲罷歸所舉德清道中語真能引分  
自安者而罷未久以邑邑不樂疽發背卒何也思玄子

桑悅常熟人負才而躁為柳州通判侘傺失意故其語  
曰鷓鴣道我行不得杜宇勸人歸去休又云投荒此日  
無言語不與宗元競柳州雖弘曠不足而旨趣亦悲切  
矣書尤縱誕可惱海釣蕭顯山海人按察僉事以病歸  
此君書名彷彿張南安而囿囿未稱雪賦禁體復步險  
稱奇宜其都不成語也吳文定公寬蓮溪輓章作蘇體  
極古雅咄咄逼真謝文正公遷卷冊語耳王文恪公鏊  
與楊循吉一札有前輩虛度而為俗子蛇足一印章不



能洗之文定長洲人文恪吳邑人連舉壬辰乙未會元  
及第文正餘姚人則乙未狀元也吳至禮部尚書翰林  
院學士贈太子太保謝至戶部尚書謹身殿大學士王  
至戶部尚書武英殿大學士俱以少傅太子太傅贈太  
傅三公年位聲實伯仲也第文苑之績吳王居優清朝  
相業謝尤表表矣太子太保刑部尚書贈太保洪襄惠  
公闕一札乃撫順天時致閔莊懿者少師太子太師  
吏部尚書華蓋殿大學士贈太師順德梁文康公儲一

詩乃宮坊時送王冬官者南京吏部尚書封新建伯餘姚王公華一札乃宮諭時簡閱莊懿者閱時長中臺也侍從邀御史飲而勤拳為其長乞半日假亦見當時法紀之嚴三公通人也不無館閣方面勞而有豪賢之累往往煩白簡然俱寬然長者太子太保刑部尚書贈少保林貞肅公俊南京禮部尚書贈太子少保邵文莊公寶各詩一紙詩吾所未論其書一畝細若焦螟而著剛勁一麓濃如蟭螋而表儒雅人云書筆能觀人心行不

敢信也卷二十人凡二十二紙而吾郡得十之四

第四卷南京吏部左侍郎泰州儲文懿公瓘次韻雨花臺一律詩拙而微有句書拙而微有筆少保太子太保吏部尚書贈少傅太原喬莊簡公宇題戴文進畫歌此老以詞翰名歌語步驟起伏全自李長沙派流出才小乏耳書法當亦如是太子太保吏部尚書陸公完吾郡人也才畧勲猷冠一時而失計作表絲身名俱敗其書亦李長沙詩跋也弘正間賞識如此太子太傅禮部尚

書贈少保毛文簡公澄吾州人狀元及第嘗佐陸公於吏部恬靜無欲於鼎革之際持議侃然其與王父書談公私情事皆實境而筆尤拙吏部尚書贈太子太保泰和羅文莊公欽順毛公榜第二人也學行尤自超家書一紙寄仲氏按察叔氏中丞者頗及一時桑梓事南京禮部尚書贈太子少保華亭顧文僖公清為陸太宰賦也適園詩甚有致語與羅公筆俱清勁新建伯南京兵部尚書都察院左都御史贈新建侯王文成公守仁一

絕句毋論公理學熟猷鉅公已詩秀拔有致結法亦楚  
楚卷中閱至此大醒人目南京吏部尚書崑山朱恭靖  
公希周也適園詩亦為陸太宰賦者公生平不作一行  
草筆此書極謹細而無取精微其與辭足先輩風太子  
太保南京兵部尚書贈少保無錫秦襄敏公金一札乃  
及撫楚時與臺使者公嘉靖間能臣也南京禮部左侍  
郎贈尚書王文定公瓚送王父歸田一章其書似學高  
閑詁光而不得筆公以無心稱新禮得調南亦竟用是

得嘉謚事固難料也應天通判長洲祝先生允明書家  
龍象也一札雖草草亦自有天趣江西提學副使北地  
李空同先生夢陽陝西提學副使信陽何大復先生景  
明文章家麟鳳也吾嘗見李先生寫七尺碑大有顏平  
原筆而此札拙畧乃爾何先生倣李長沙而指小滯三  
詩出語便自不凡工部尚書贈太子太保建業劉清惠  
公麟生平於尺牘留意此札却有事際語而書筆尤得  
聖教風吳縣東橋顧公璘才名與劉公伯仲而詩語尤

俊此則小竿尺耳亦見一斑公官至南京刑部尚書前翰林侍讀學士贈學士蘄縣豐公熙三詩成閩時作也辭筆俱清密有致其子坊以南考功主事謫歸坐事後易名道生才藝亦跨竈而狂衰之行家聲隕矣此札多風語可笑書筆殊拙畧而中有八法非學士可及也翰林院待詔長洲文先生徵明與王中丞履約書甚詳待詔生平無此苦蓋喪其第三郎君時也白香山敘其詩自謂分司後無一日不樂止哭子兩章得悲境耳待詔

殊似之太子少保吏部尚書贈太子太保吳江周恭肅公用書一紙公為宰當相臣操秉日而能以職自完者也南京兵部尚書贈太子少保增城湛文莊公若水詩一紙太常寺卿贈禮部右侍郎崑山魏恭簡公校尺牘二紙二公雖齒懸絕而一時成進士又一時以道學鳴者也考湛公詩蓋年九十一矣而游衡嶽聞公以一棺自隨前後諸生導護之頗行勝地作書院此豈其時耶魏公牘蓋與周允之侍郎父子而與其子者尤近裏着



已讀之悚然此卷二十人得二十二紙最多名賢大夫而亦多書家者流吾郡仍十之四云

第五卷少保太子太傅禮部尚書武英殿大學士贈太保崑山顧文康公鼎臣一紙乃與王父司馬公書也寒暄語亦自詳縟詹事府詹事兼翰林院學士贈禮部右侍郎陸文裕公深早朝及禁中觀雨詩二首詞翰俱清麗然比之公生平差為落夾太僕少卿王南原先生韋雪中簡顧英玉詩僅小有致而後云讀樂天八駿圖至

泣下故當爾也先生館試詩有雕欄十二畫沈沈畫棟  
泥融燕初乳句傳縉紳間今似未能稱太僕寺卿邵康  
僖公銳在江藩時一札與周充之侍郎不多語而惻然  
有共濟意太子少保南京戶部尚書贈太子太保武進  
周襄敏公金亦嘉靖中能臣也詞翰亦自楚楚前翰林  
院修撰贈光祿少卿新都楊公慎以博學名世而書亦  
自負吳興堂廡此與姜龍憲副札亦自一斑翰林院修  
撰進賢舒公芬與楊俱狀元及第俱有直諫聲而舒公

早天至於清節則大徑廷矣貴溪夏文愍公言舒公榜進士也官至少師太子太師吏部尚書華蓋殿大學士以讒死此札與其邑朱令者公時在政府貴態淳淳辭旨間而結法却老蒼有李西臺風詹事府少詹事兼翰林院侍講學士贈禮部左侍郎東廣黃文裕公佐所為擬天寶宮詞六首實嘉靖宮詞也詞筆俱婉麗有旨今少師太子太師吏部尚書建極殿大學士華亭徐公階與余往復書札頗不少而此則見貽詩也公名臣不擬

以詩翰名然亦自穩密都察院右副都御史吳興王公  
守一札是行邊後寄其弟履吉者內言劾榆林帥及中  
貴人忤當道意幾致紛紜在其時已如此王太學寵即  
履吉也所書獨樂園記語緊密而饒韻人謂乃兄書不  
下履吉以名掩不也其間實可容數人右春坊右贊善  
贈光祿少卿吉水羅文恭公洪先一小札乃與吾師季  
觀察者此公極有翰墨聲以小故園圍不快陳太學道  
復長洲人一律四絕語平平耳而散草極古澹在懷素

林藻間是得意筆也吏部員外郎長洲王先生穀祥小  
札數行亦可觀溧陽馬君一龍者余同年也仕至國子  
司業在翰林時使青州為余書紀行萬字皆小行割其  
百之一於此吳邑彭先生年游虎丘得五言律四首馬  
君狂草不堪與顛史作奴彭先生藁行眉山顰步而此  
皆能脫生平窠臼可重也其後三紙河南按察使濟南  
李攀龍于鱗福建按察副使廣陵宗臣子相詩各一江  
西左布政使吳興徐中行子與書一余所得於三君子

者不啻牛腰卷而僅留其一以志感耳中間于鱗名最高其文辭最古而書最拙幾不成字故人梁思伯集李與獻吉仲默三札而曰此何必減元常逸少也余甚感其言卷中二十人為二十紙而吾郡亦十之二

余後先所鳩我明名筆凡竿尺小文歌詩之類合之正得百人因釐為五卷或名德已著而八法無聞或倡雪雄舉而臨池鹵莽所不敢廢苟使伯英烏巾敬元白練即蹈隱淪亦在旁采比於趙宋蒙氏之際郁郁乎盛矣

或謂老鐵硯然洛下遺頑不當廁之維新之代第考其  
詞筆似是晚年毋妨兩收良足壓卷或謂達善茅靡鼎  
革之間元玉筴失屯夷之代全卿外私廣陵之托九和  
內酣汾陽之奉雖藝有通塞而名俱下中猥以桑梓無  
辨竽瑟第其名位勲伐亦自炳烺非為錯濫或又謂人  
一落魄舉世所唾屈指全數更贏百一所宜汰削靡使  
敗羣正以愛其書筆不輕人廢今附之先學士之後覽  
蹟如存品士焉有雖愧懲一之嚴無妨則百之數余聚

法書後先數載勞同狐腋好比珠船然甫完帙即擬韜  
之了不再展賞鑒之家笑以為老鼠搬生薑其何辭以  
對

三吳墨妙卷上

右三吳墨妙卷上為華亭沈學士度養心亭記作隸古  
體雖不甚去俗然已出宋人上弟大理少卿粲手東小  
行道逸有度武功伯天全徐先生有貞太和登祀賦及  
送夏提點詩稿草種種有筆意特不獲縱耳時尚未改



名也太宰錢文通公溥奇花歌事與書法皆新異而語  
平平不甚稱宗伯倪文僖公謙與僧求竹帖却無意而  
有筆陳祭酒鑑為練從道義塾衍慶堂記從道景泰中  
健御史也陳日臨褚摹禊帖故似之而原本過佻不若  
魯男子之善學耳南安守東海張先生弼書昌黎石鼓  
文歌是其最得意筆道縱怪逸高一世而不能去世法  
李少卿應禎與稷園先生札稷園者劉欽謨也所論魯  
齋文及借書具見前輩能好學千里不及私李筆本道

而不無佐史嘆吾長洲沈石田周倣雙井僅得其竦肩  
寒儉耳不得勢也此三詩尤圍圉宗伯吳文定公寬與  
貞伯一札辨鄉飲碑字亦如貞伯之寄欽謨其與陳玉  
汝一札具見友朋真意而書亦能去俗太傅王文恪公  
鑒要客落成數行比之生平稍有肉柳州倅桑思立悅  
詠懷詩在弘治庚申具語意似以米魯用兵故耳書法  
視南安又鄒魯矣祝京兆允明二東所論皆瑣屑事而  
超逸乃爾頓令人神醒翰林孔目蔡林屋先生羽一詩

語亦多警俊惟程字韻押不過其書驟見之未有不以  
為徵仲少年筆者唐解元一札草草其書軟熟亦不惡  
丈待詔徵明石湖三詩清語老筆殊覺近人大司寇周  
康僖公倫送秦給事謫官亦尤勁此老初不以書名而  
晚頗琅琅亦可以見一斑也凡十七人二沈錢張松之  
華亭人徐陳李沈吳祝唐文吾蘇之長洲人王蔡吳縣  
人桑常熟人周崑山倪上元人

三吳墨妙卷下

右三吳墨妙下卷顧尚書璘與弟英王論作詩法甚詳  
人謂英王不甚惇鴈序觀尚書署已號而字呼其弟居  
然典刑徐髯仙霖雖尺牘數行亦自鬱跂於頽然中見  
老手陸文裕深五十自壽二章亦典雅書法最道麗風  
骨蒼然唯結構一二筆小涉疎耳金赤松琮赤壁二賦  
墨氣腕力俱勝三君子俱得三昧者行家要推元玉士  
氣則讓子淵徐博士禎卿以詩甲海內而書極少不多  
見二絕句非其至者然亦有江左王謝門風行筆道雅

一時在文蔡間余於王家馭提學見真跡乞其兄元馭  
侍郎手搦之翩翩出藍矣陳太僕沂二絕尤楚楚其倣  
眉山當在文待詔下吳文定上顧橫涇璵即所謂英玉  
者也以憲副罷貧死生平節目磊砢人謂風槩踰伯此  
詩與筆則小國之賦耳殊不堪魯衛也王茂才逢元結  
法頗溫茂得晉人意太僕韋子也事事不克負荷而臨  
池一枝遠勝家尊陳白陽道復書魚游春水古詩而筆  
大似林藻駁駁乎有楊少師風王雅宜寵小行五絕句

是初變舊體者道骨顛姿與冶態並見而不免傷有意  
然尚足壓卷國子王司業同杜徵仲甥也詞翰爽朗酷  
似其舅奉化令徐長谷獻忠詩領聯有味而次聯遂失  
粘豈所謂倒紉孩兒耶袁提學襄寄王履約詩是初年  
作者以故尚矜局結法亦密而不能寬然自如王選部  
穀祥索鄉錄帖亦足徵好學一斑老筆紛披尚有生氣  
朱九江藩為余書數十詩成一卷今割得二首詞旨婉  
而疎書却疎雋婉雅得唐人散僧入聖意陳方伯蓋一

律乃蜀中寄余者筆亦流利可喜彭山人年三絕句調  
張伯起小楷極端謹而辭旨逸蕩可謂二反卷凡十六  
人徐子仁金元玉陳石亭王逢元皆金陵人二顧則吾  
吳人而家金陵者陸子淵松之上海人徐伯臣華亭人  
陳白陽吾蘇之長洲人王履吉袁永之陳子兼則皆吳  
縣人王繩武崑山人朱子价則揚之寶應人

祝京兆真行雜詩賦

京兆此詩是才情初發時語此書是工力初透時筆以

故於用意不用意間最得妙理余絕傾賞之而王百穀  
以為文休承臨本之佳者得休承面印證乃大快今年  
閉闕來諸名蹟盡付兒子輩案頭僅餘此乃以寄穆丈  
俾示虎兒作臨池一小助可也

祝京兆文稿

祝京兆希哲操縵稿一卷凡記三牒記二十三說五傳  
一敘二吏俵一戒一銘一書體二曰真曰直行法錯鍾  
歐吳興凡六千三百三十九字蓋弘治以前書也故不



能盡脫滯俗而中有絕佳與古人爭勝毫髮者世眼或未之識耳

祝京兆六體書

沈啓南擬畫若北苑巨然大癡黃鶴靡所不酷肖獨於雲林未盡爾也或謂其巧力勝之故祝希哲擬十餘體種種逼真而至蘇黃是腕指間物却時失之此卷以杳拖作眉山以矜局作雙井幾墮老匏白石叟窠臼母亦坐巧力太勝耶此外雖於眉眼未盡是然抵掌談笑令

人躍然有黃初永和想象先但寶此足雄墨藪間不必  
購淳化寶晉矣

祝京兆書七詩

祝京兆生平好書晚唐句獨此王右丞岑嘉州杜少陵  
錢左司劉隨州諸公七章乃唐人第一才情詩其所作  
行草則吳下第一風骨書今年盛夏客有攜過山堂者  
為讀再過陰飈驟來急雨助爽九咽皆快雨後暎南榮  
縱覽八法跌宕逸種種幻變與雲霞並舒卷大快事

也客喜談玄自詭冲舉可立致余笑謂之此詩固佳但多嘆老嗟貧怨別傷亂語異日勿攜之道山金庭中不免羣真駁放也客笑不答第趣余題之而去

祝京兆感知詩墨蹟

在昔延之五君子美七哀非托況前哲即徇感故知而吾郡文徵仲亦倣之第皆逝者獻吉仲默則稍稍兼存沒而祝京兆希哲則以古體懷逝者以近體懷存者為人十有八為詩十有九蓋獨王履吉得二章以孔稱忘

年之契深耳此書乃晚年筆尤雅健兒曹不知何自得之喜於懷知之目擬贈其師龍身之先生而合仇英所圖竹林七賢成一卷豈謂持此謁先生便堪把臂入林耶得援戴司農例後堂受經之暇博一醉足矣欣然為捉筆題其後

祝京兆草書二歌

此書初覽而甚駭其牛鬼蛇神以為不類京兆稍一再展而後覺其妙非京兆不能也其取勢全用元章而清

臣筋平原骨隱隱自露詩歌亦稱是雖然以擬右軍之  
虛和右丞之秀雅則俱有所不足耳

祝京兆書成趣園記

祝京兆希哲為華光祿尚古成趣園記幾三千言狀其  
峰巒池館紆餘曲折之勝不遺餘力其書法頗出趙吳  
興然吳興邁而媚京兆邁而古似更勝之余初得一本  
付駿兒為楷式八月自金陵過里中華之宗人叔達強  
以投余輒去追而返之不肯納稍間校前本行款大小

不甚遠而結構微有出入然各遵其妙豈光祿有二子  
京兆各為書一本耶華之園餘八十載不復可蹤跡而  
此記尚存言之不可以已也如此

祝京兆諸體法書跋

祝京兆擬古以下四章擬黃庭春游二章擬蘭亭差小  
若閨懷則曹娥洛神之流耳古言一跋擬章草跋及古  
調亦然而微涉仲溫然皆古雅有深趣昆福寺以下五  
章鋒微斂六宮戲嬰圖以下三章鋒微露然姿態似勝

不知洵然誰擬要之自晉人流出朝元引以下九章擬  
眉山秋夜以下四章擬雙井小米山水以下二章及渡  
口一擬南宮闕風神宛然第中間微雜一二已筆蓋不  
欲為韓幹似也修夕辭以下六章結法與黃庭並觀書  
之卷末當似擬趙吳興恐吳興尚少此一段古趣余老  
矣所見京兆墨蹟不下百餘本未有若此之種種臻妙  
者真令人心折內所擬歐顏峭者病姿莊者病韻二家  
本自難學毫釐千里少損連城可惜二月病瘡金陵十

指木強覽此興發題其後真是狗尾

又

書之古無如京兆者文之古亦無如京兆者古書似亦得不似亦得古文辭似亦不得不似亦不得

題祝氏蹟

祝希哲五詩真蹟一字外老筆紛披始露軼塵之妙使皮相之眼覩之未有不以為張翼之亂真也詩語弱而有佳趣大似晚唐人或即希哲老忘不能辨姑識於是



祝京兆書夷堅志

祝京兆手書夷堅丁志凡三卷皆小楷雖不甚經意而結體出吳興時時有晉人法計此例之為卷尚當有九十七今不知所在矣夷堅志在諸說家中尤為卑猥庸雜即刻本覽一過便舍之不足留何至作此不急事耶京兆任誕好怪與景盧臭味合宜其爾也比之待詔杜陽春風斯下矣

祝京兆書祖廷貴墓志真蹟

祝京兆此書雖做眉山而微墮樗寮塹然斤斤有古意  
其文吃吃期期極步趣古而乏古意可謂兩反也

祝京兆書李太白傳後

太白歌詩既奇其人與事又奇不敢望司馬子卿手作  
傳得李延壽亦小快無柰宋景文於喉咽間作囁嚅語  
令人憤悶幸而有祝希哲書之差足快也祝書初看若  
草草而不乏意又似沓拖而不沒骨依約虔禮緯乾間  
然以擬太白詩尚隔一大塵

文待詔行書

右文待詔行書先友詩八章歲朝次日立春七章對雪  
三章皆五言古體過竹堂一章春寒一章次蔡九遠湯  
子重王履仁各一章履約二章皆七言近體流麗清逸  
時時有會心語書法摹聖教序遂無毫髮遺恨優孟虎  
賁不足言也晚筆雖老蒼覺稍離去之耳此詩書於外  
家為吳遜庵參政時正德之甲戌也歲朝所謂開歲四  
十五吾行已云衰然又四十五年而後遊道山人生固

難量也此帖今歸吾吾年已五十四不知後日云何捉  
筆一歎

文待詔書杜陽編

蘇鶚杜陽編乃郭子橫洞冥王子年拾遺之類而自詭  
勝之以其頗雜時事也文待詔徵仲小詩以精楷錄之  
無一筆失度昔人稱孟蜀王仁錯好手錄書至數千卷  
卷皆白藤紙細書極為端好每候朝尚於檐子上得一  
二番若待詔與仁錯真可謂篤好書者也第公以誠實

心信侈誕事以精謹筆書狂肆語大若相反者聊識於後

尤叔野赤壁卷

余以癸酉七月望與守巡三君同登赤壁汎大江痛飲劇談於月色中幾達曙乃成此二律今春卧弇山園屈指四周歲矣無錫尤叔野得文待詔徵仲書蘇長公二賦托待詔子休承補圖口占余詩俾錄于後余名位何敢望蘇公不幸譏讒起躋之跡乃復過之俯仰今古可

發一慨徵仲書小楷古隸皆工獨休承所畫絕不類而蘇公賦語奇勝處小似過情異日叔野能壯游當為一勘破本來面目也

文待詔小楷周召二南詩二王目錄

文待詔後先書周召二南中字誼之類詒者及臨江二王帖目錄中之有元章長睿攷訂語者皆作蠅頭小楷精工之甚第毛詩全傳當更有數百千條二王帖當更有大令而今不知落何所矣待詔此書在正德己卯業

五十歲而矻矻作老蠹魚不休當是通德里翁張烏巾  
合作一人前輩用力精迺爾真使人慨羨

文徵仲手札後

右文待詔公徵仲手札二十八紙中多與趙梁父陸子  
傳二先生者趙先生之孫某陸先生之館甥也裝池成  
卷俾余題其後余嘗考之晉唐以還名筆於高丈大篇  
絕不多見所存唯尺牘今海內傳文公春容之作既富  
而寂寥數行如茲卷者亦復寶之不啻拱壁亦盛矣哉

第卷中多謝餉物語即不過一算器食公勤拳手書以  
報知世之欲得之也昔顏魯公貴至八座而乞米乞鹿  
脯於李太保豈魯公臨池不公若抑闕巖穴之包苴  
更饒於廊廟也若二先生者賢於姚麟殿帥多矣

跋文待詔歐體千文

文待詔不多作率更體所見唯張奉直墓表石刻及此  
千文手蹟耳石刻小於皇甫碑筆近肥千文細於化度  
銘筆稍縱於整栗遒勁中不失虛和舒徐意致佳本也



唯彭孔嘉中歲書有出藍之美晚節則一束楚耳夏  
日三四舒展令人忘暑

丈衡山手柬

丈待詔與韓懋賞及祖父三代手札大要是謝餉物語  
耳懋賞能寶之且乞諸賢題識以侈之賢於叢山姥姚  
殿帥多矣

丈待詔書程鄉令遺愛碑墨蹟跋

昔太丘長文範陳公卒而蔡中郎伯喈為文勒於碑且

手書之古今以為勝談今讀盛宗伯端明所志程鄉令平湖陸公遺愛碑亦何以異也陸公名德不敢遽謂如文範然程鄉之政循循殆欲過太丘矣宗伯之文與人亦不敢遽謂如中郎晚途一屢差類之至於少年風節矯矯亦中郎流亞也中郎之所撰中郎自書之宗伯之所撰文待詔徵仲書之以待詔之小楷雖不敢望中郎之八分要亦有雲仍也太丘有子元方季方元方之子長文賢貴者累世程鄉之子光祿卿光祿之子少司空

尚書郎郎之子大司寇學憲名德不下陳氏而盛過之  
人謂長文公慚卿卿慚長司寇學憲於其先則有光矣  
司寇之子基忠出其碑乞不佞跋蓋謂不佞能尚論前  
哲而俾之廁於徐文貞許太常陸少保莫方伯之後將  
無使不佞作盛公慙也今海內所知稱者大司寇耳以  
語光祿卿則恚恚何況乃程鄉公雖然陸氏之文獻固  
程鄉公濫觴也毋念爾祖聿修厥德基忠勉之乎哉

丈王二君詩墨

文徵仲先生詩有致書有格王履吉先生詩有格書有  
致此冊作於嘉靖改元壬午徵仲年五十二履吉僅二  
十八視晚歲結法稍不為遒緊而風韻却更藹然詩亦  
楚楚稱是趙承旨稱右軍楔帖謂乘退筆之勢而用之  
二先生皆能用退筆尤可愛也

續名賢遺墨卷

續名賢遺墨一卷首為楊鍊崖廉夫七言律句句使事  
而古人姓名居其六甚可怪余所以收廉夫書者蓋入


明之八年而後捐館也所以廉夫壓卷者雖明人不為明祿縻也王學士達善折簡一僧內云徐殿下尚未授職得非謂中山王少子膺緒乎亦以見當時稱謂如此林學士闕題張氏手澤辭與翰俱質勝此君及第垂

四十年踰七袞而尚滯五品彼時故如是也解舍人禎期臨右軍二紙字大於本書而踈雋自喜似不失春雨門風馬宗伯性和張學士士謙所題城南書屋詩其畫為戴文進筆余故有之今割此二紙劉參政欽謨余太

保子俊跋詩皆卷冊中物也而皆真跡陸太常鼎儀傷  
張亨父二詩不能佳不知亨父何與劉後邨也趣韻之  
難乃爾羅祭酒明仲似得宋仲溫筆而未成長然在其  
時亦錚錚張修撰亨父蕭僉事文明各詩一紙文明書  
鴈行汝弼而今僅先驅亨父何也謝文肅鳴治李文安  
世賢謝文正于喬亦卷冊中筆耳然各微有致程侍郎  
敏政合處不減李賓之而時帶俗氣林貞肅待用邵文  
莊國賢之所可重者固不在書也第邵稍近臨池而尤

行行陸太宰全卿跋李文正詩余割留於此以備一家  
顧文僖公廉為太宰賦也適園詩着意筆也殊令人眼  
明王文定廷獻贈王父司馬公一章倣汝弼而稍麓勁  
劉清惠元瑞與履吉尺牘甚佳蓋敵手相值耳元瑞書  
已見前余喜而復留之顧文康九和復先王父紙當是  
以先達故加審謹魏恭簡子材手札二紙嚴凝篤勵使  
人悚然書所不論夏文愍公謹簡朱令令吾鄉人辭旨  
貴態淳淳第筆蒼老可取也王中丞履約寄弟履吉家

信內言劾榆林帥及中貴人忤當道意幾致紛紜在其  
時已如此王吏部祿之一小札也與履約筆俱楚楚大  
抵諸公以人重其能兼以書重者十不三四耳全卿九  
和公謹最貴而不無齒頰微恨漫識於此



弇州續稿卷一百六十三